

Bagilearen 16an egingo da Arratiatik Urkiolarako errogatibea

Autobusez, eta Dimatik, Igorretik eta Zeanuritik oinez egiteko aukerea izango da

“Urkiola joan, zapatak urrutu... Aita San Antoniok barriak egingo ditu...” dino koplak zaharrak, eta oinetakoak urrutzeko aukerea izango dabe Arratiako oinezko errogatiban parte hartu gura dabenek. Bagilearen 16an, zapatuan, egingo da Urkiolara, Paduako San Antonioren santutegira errogatibea. Tradizinoa jarraituz, San Antonio egunaren osteko zapatuan izaten da arratiarren errogatiba eguna; lehenago herri bakoitxak bere errogatibea antolatzen baezan be, azken urteotan, Arratiako parrokia guztiak aldi berean joaten dira Urkiolara, bailarako abadeakaz batera; horretarako, Arratiako Udalen Mankomunitateak lau autobus ipiniko dauz. Autobusean joan etorria egiteko, ala etortzeko baino ez bada, izena emon behar da aste bete lehenago. Dana dala, erromes guztiak ez dira autobusean joango, batzuk euren kotxeetan eta beste batzuk oinez joango dira eta.



Arratiar asko hurreratuko da Urkiolara, batzuk kotxean edo autobusean eta beste batzuk oinez

Oinez Dimatik, Igorretik eta Zeanuritik

Aurten be Arratiatik Urkiolara joateko oinezko ibilaldi gidatuak izango dira Dimatik, Igorretik eta Zeanuritik abiatuz. Dimako plazan goizeko 06:00etan izango da urteerea, Igorren be ordu berean San Antonioren ermitatik abiatuz eta Zeanurin San Antonio txikerraren (plaza ondoan) ermitearen aurretik abiatuko dira, 07:30etan. Zeanuri eta Urkiola lotzen dituen ibilbidea orain dela hiru urte seinalizatu zan *PR-BI 1* moduan; Joko Alaiko Alkarteko boluntario talde batek seinalizatu eban Zeanuriko Udalaren laguntzeagaz eta errogatiba eguna bide hori erakusteko eta ezagutzera emoteko aprobetxatuko da. PR-a Zeanuriko plazatik abiatzen da, Soloeta eta Makaztui auzuneetatik igaroz, Zumeltzako atsedenekura zuzentzeko, eta hemendik santutegira dagozan 5,5 kilometroak egiteko, GR 12 (Euskal Herriko bidezidorra) ibilbide luzea jarraitzen da. Martxa normalean, hiru ordu eta hamabost minutuan egin daiteken ibilbidea da.



Ibilaldi gidatuetako bat Zeanuriko plazatik aterako da, goizeko 07:30etan

II. argazki lehiaketea

Aurten be argazki lehiaketa izango da. Zulaibar Lanbide Ikastegiak antolatutau, Arratiako herriak Urkiolara egiten dabenek errogatibea gai moduan hartuta. Gaiagaz zerikusia daukan edozein argazki aurkeztu ahal izango da, balio antropologikoa, etnografikoa, erlijiosoa edo naturalistikoa euki daikena. Irabazleak 200 euroko balioa izango dauan saria eroango dau, Arratiako Merkatarien Elkarteko edozein denda edo zerbitzutan gastatu ahal izango dan bonoa. Argazkiak emailaz edo postaz bialdu ahal izango dira honako helbideetara: errogatibea@zulaibar.org edo Arratiako Andra Mari Parrokia, Elexalde 22, 48140, Igorre.

Egitaraua

Aurtengo errogatibearen lemak “Jaunari kanta ona da-ta!” izenburua daroa. Lema honegaz zera azpimarratu gura da: alde batetik Arratiako herrien kanta eta musikazaletasuna Jainkoa goratzeko be baliogarria dana, eta bestetik, aurteko herri antolatzailea Artea danez, Arratiako herri musikari bi gogoratzea: Leon Bilbao eta Maurizia Aldeiturriaga. Hildako musikari honeen seme-alabak, gurasoen musika tresnak eroango dabaz Urkiolaraino, danon izenean Jainkoari aurkeztuteko eta bere bedeinkapena jasoteko.



Antolaketeagaz arduratzen dan parrokia, Arteakoa da aurten. Egitarauari jagokonez, hamaikak baino

Igazko Arratiako errogatiaban parte hartu ebenen talde-argazkia

lehentxoago, ongiatorria emongo jake oinez, autobusean edo euren kotxeetan Urkiolara hurreratutako arratiar erromesei. Ondoren, eta aspaldiko usadioa jarraituz, letaniak abestuz



2017an Igorreko parrokia arduratu zan antolaketaz, aurten Arteakoa arduratuko da

sartuko dira erromesak Urkiolako santutegira, 11:00etan Arratiako abadeak emongo dabenez mezea ospatzeko. Meza ostean, eta talde-argazkia egin eta gero, Gorbeialde Landa Garapenerako Alkarteak eta Arteako Jubilatuen Alkarteak kopau bat eskainiko deutsee Urkiolara hurreratzen diran arratiarrei. Ekitaldi honegaz egitarauari amaiera emongo jako eta Autobusean etorritakoak 13:00etan euren herrietara itzuliko dira.

INFORMAZINO GEHIAGO: www.arratia.tk / Bideoa: <https://youtu.be/ZLtG135v4nE>

Nortzuk ziran Leon eta Maurizia: <http://arratiaeeliza.blogspot.com.es/2012/08/artea-leon-eta-maurizia-gogoan.html>